

瞥

記

清白士集卷二十

梁玉繩

管記三 史

戰國秦策姚賈曰太公望齊之逐夫子良之逐臣又曰晉文公
用中山盜而勝於城濮皆不見所出燕策云陽虎之難孔子
逃于衛亦未聞

齊策孫室子陳舉注公孫家子猶宗室云稱號甚別

室姓苑有
孫氏

燕策蘇代遺燕昭王書云秦爲西帝趙爲中帝燕爲北帝立爲
三帝而令諸侯天下孰敢不聽秦齊稱帝之後又有此游談
當時已無魯連其人大聲呵之而昭王猶善其書何哉

司馬貞補史記序云本紀十二象歲星一周八書法天時八節
十表放剛柔十日三十世家比月有三旬七十列傳取懸車
之暮齒百三十篇象閏餘成歲張守節論史例襲之惟改列

傳七十象一行七十二日言七十舉全數餘二日象閏子長本無此語穿鑿可笑王若虛曾斥其妄

五帝紀北發當是北戶大戴禮記作大教不可解曲阜孔檢討廣森補註云大大人汪芒氏之國也教教民也其爲人黑山海經有焉

裴氏集解引鄭玄云由內爲姦起外爲軌案左傳成十七年亂在外爲姦在內爲軌虞書孔傳全鄭意與傳相反何也

余嘗疑少昊是古官名

見史記志疑一

今又得一證越絕計倪內經少

昊主金與祝融后土玄冥太皞爲五方之官則爲官名審矣夏本紀與河渠書及漢溝洫志竝言禹治水在外十三年尸子言十年吳越春秋言七年三國志高堂隆傳昔洪水滔天使鯀治之績用不成乃舉文命隨山刊木前後歷年二十二載

蓋依史漢之十三年又并鯀九載數之也其實當以孟子八年爲定金仁山謂兗州賦十三載乃全故以爲十三年說本禹貢注疏蔡九峯諸儒已非之孔疏引馬融謂禹治水三載并鯀九載爲十三年八州十二年平兗州十三年平未免臆撰至路史作治水三十年尤不足信

周本紀載呂刑惟貌有稽作惟訊有稽海寧陳仲魚

名鱣

云說文

糸部引周書作緇訓爲旄絲次緇字於細字之下當有細義言惟細有所稽攷也貌字乃衛包私改郭忠恕汗簡釋緇爲貌失之矣史記訊字疑緇之誤說文訊重文作𠂔與篆文緇形相近耳嚴九能云古兒字作緇故汗簡云然此古文假借非誤也古文廟作𡩡亦从緇省廟者兒也

紀言厲王在位三十七年元末可深信然欲攷世表世家年次

不得不依以爲說許周生謂本紀誤竹書十二年流彘近之
溫公通鑑始于周威烈王二十三年命三晉爲諸侯以爲天子
自壞其紀綱特著篇首爲後世戒宋樓鑰獨謂此書之作實
繼左氏傳溫公不敢顯言之爾左傳以三晉事終通鑑以三
晉事始攻魏此論甚確見本集

太史儋言合十七歲而霸王者出焉周紀與封禪書全秦紀作
七十七歲老子傳及漢郊祀志水經渭水下注竝作七十歲
余謂自始皇初生逆數至惠文改元爲六十六年而後四年
西周亡鼎入秦恰得七十年海寧錢廣伯云名腹恰得七十既
非初生復非卽位如何似當闕

秦本紀大廉玄孫曰孟戲中衍鳥身人言鳥身上似脫中衍二
字不然太戊妻之當何屬而下文所謂中湣者又誰之玄孫

廣伯云其玄孫曰中湫上有中衍之後句

武王之謚疑當以悼武爲定廣伯云下文悼武王后山歸魏則本篇有足證也

秦初并天下分三十六郡史不著其目參攷漢志續志連內史祇三十五尚缺一郡案水經灤水注云始皇二十三年滅燕以爲廣陽郡漢高帝更曰燕國余據以補郡數之缺

詳史記志疑四

趙誠夫水經注釋引顧亭林北平古今記謂漢志廣陽國昭帝元鳳元年置當以昭帝置者爲定恐未盡然孟堅志地理但舉大畧文義簡古不能盡詳卽如漢更秦廣陽爲燕國高帝時封盧縮及其子建文帝時封劉嶧武帝時封子旦直至昭帝因旦謀反誅地入于漢改用廣陽舊名宣帝仍而不易中間凡二次國除爲郡孟堅皆不書則其不言秦廣陽郡者

畧也秦有黔中高帝更名武陵孟堅不云故秦黔中郡亦是
脫畧不書與廣陽一例矣

始皇本紀年十三歲古無年歲並稱者日知錄謂古人但云年
幾何不言歲也自太史公始變之錢廣伯云孟子鄉人長於
伯兄一歲趙策太后曰年幾何矣對曰十五歲矣則言歲不
始于太史公

許周生云始皇八年王弟長安君成蟜將軍擊趙反死屯畱軍
吏皆斬衍死字
漢志無遷其民於臨洮此爲一事據漢書五行志所

引止此可證以下另爲一事將軍壁死壁當是將
兵在外者卒屯畱蒲

鵠反前所衍死
字疑在此戮其屍蓋蒲鵠以屯畱人聞遷屯畱民懼禍

及已故因將軍之死而反反亦卽死故戮其屍也 呂后紀

末前言東牟侯與滕公除宮麾執戟者拊兵罷去載少帝出

則宮中已無一人乃又云代王入未央宮有謁者十人持戟衛端門此十人何自來乎且天子未出而一麾罷去今帝已出而十人者謬言天子在宮以止代王之入轉必待太尉往諭然後去則十人明是太尉所使俾知操縱之權實出于已故文帝卽夜拜宋昌張武收兵柄以備不測一時君臣情事史公以掩映之筆出之綜核上下文史公不應乖反如此固自其微意所在爾

泰山碑曰施于後嗣化及無窮遵奉遺詔永承重戒是帝在而亦可稱遺詔也

嶧山碑極簡古決是秦時之文水經泗水注始皇觀禮於魯登嶧山命李斯以大篆勒銘山頂名曰書門其鄭重如此且爲刻石七篇中之第一篇太史公獨闕不載何也盧學士謂史

文有脫誤其說見所著鍾山札記

春秋之法雖無事猶必書孟月史記周以後本紀是年無事則并年逸之獨始皇紀於三十年特書曰無事此史公創例全書亦祇一見

始皇因圖書曰亡秦者胡乃發兵擊胡而不知爲胡亥路史後紀注引世紀曰桀見錄書云亡夏者桀於是大誅豪傑何其類也

子長爲項羽作本紀班叔皮譏其失唐已來諸儒皆言羽不當列本紀惟羅泌以爲得編年之法未敢謂然明吳偉業綏寇紀畧言張獻忠自爲一文歷評古帝王以楚霸王爲最眞盜賊之語也

高祖本紀漢將別擊布軍洮水南北皆大破之追得斬布鄱陽

全氏經史問答謂洮水當作洮水在九江布敗于斬反走其國又敗于洮乃思投長沙未至而死于番陽許周生云別擊者擊布別將之軍非布在洮水也追得斬布鄱陽遙接上文布走令別將追之也全氏似未審

世表從湯至黃帝十七世依史數之是十八世非十七世許周生云諸數世次處史蓋離身數而志疑悉連身數之以致悉差一世

十二侯表平王元年東徙維邑周生云志疑辨平王東徙在五年案周之東徙在平王元年無疑謂在五年者非也犬戎方伐周弑幽王平王以辟戎寇而徙揆諸情理必不能遲至五年之久或謂平王未必倉卒徙都亂定後乃至洛夫詩譜不言以亂故徙居東都乎若亂定則不必徙矣平王徙洛豈晉

徙新田之比哉管蔡世家言周室卑而東徙秦始得爲諸侯
六國表秦本紀全
系秦爲諸侯于幽王之末本紀言秦
襄公將兵救周因卽以兵送平王此又徙東都在元年之確
證也

周生又云晉文公過衛志疑據晉語韋注在衛文公十八年以
世家書于十六年爲誤案世家以晉文過衛在衛文十六年
甚確左傳晉文于僖四年十二月奔狄表書于五年處狄自五年
始十二年而行過衛則政當衛文之十六年國語亦言蓄力
一紀可以遠矣乃行過五鹿子犯言十有二年必獲此土僖
六年過五鹿惟內傳與文公不禮野人與塊爲一時事而外
內外傳所全傳以過五鹿在適齊前過衛在去齊後爲有岐誤國語言衛
文公有邢狄之虞不必定是見伐特虞其來伐耳若方當見

伐則當日有邢狄之變矣韋昭注以僖十八年邢人狄人伐衛爲文公過衛之歲殊非文公自去齊後于衛曹鄭旣不蒙見禮而宋襄楚成亦止聞乘馬厚幣之贈未嘗假館自衛至秦雖經歷多國而道途元非遠隔入秦在二十三年則過衛亦在二十三年史表所書非誤若謂僖十八年過衛則自十八年至二十三年此六年中文公淹留何國乎

鄭襄公十八年音樂書取我范索隱本作汜左傳成四年釋文云汜音凡或音祀王栗臣孝廉云成皐之汜水當作汜濟陰有汜水音汎又音凡成皐之水與之仝字仝音故師古注漢紀謂此水舊讀音凡今彼鄉人呼之爲祀卽釋文或音祀說也可知祀乃俗音因汜與江有汜之汜相近故俗呼之曰祀至今相沿不變而成皐之汜水直書作汜水矣若果汜水何

以舊音凡且左傳王出適鄭處于汜杜注鄭南汜也正義謂鄭有南汜東汜又楚伐鄭涉汜而歸又秦軍汜南俱作汜音凡則成皐汜水之宜作汜水審矣況正義謂涉汜之汜是地名止合

高祖功臣表昌武侯單得坐傷人二旬內死棄市此漢時保辜限也今律以受傷之輕重定期限之多寡手足及他物傷者限二十日刃及湯火傷三十日折跌肢體及破骨墮胎五十日或被傷時刻爲始過一刻卽爲限外

功臣卽侯表索隱引周成雜字解詁案周成不知何代人唐志周成解文字七卷亦不言其時文選注及唐釋文應一切經音義亦引之

建元侯表書符離侯路博德之功口將重會期書衆利侯伊卽

軒之功曰手自劒合班書亦往往效之唐樊宗師專學此等句法

蘄兒侯亦作語兒水經注引吳黃武時出拳西鄉產兒墮地便能語云天明河欲清腳折金乃生案永樂大典本天方明河欲清鼎腳折金乃生

褚少孫續建元侯表載田千秋上孝武書有蚩尤畔父黃帝涉江之語漢書千秋傳無之豈刪而不錄耶

將相名臣表鴻溝作鴻渠蓋引渠水所爲故名渠非以別名狼湯渠之故水經注謂之梁溝而梁溝卽陰溝水又有沙水浚儀之稱焉

景帝後三年正月甲子崩二月丙子太子立漢書則云甲子太子立大事記以班氏爲誤而不知史所書是旣殯正繼體之

禮班所書是始死定嗣子之儀也大事記又譏漢昭元諸帝
葬前卽位謂廢自古旣葬卽位之禮然自古卽位亦不必定
在葬後嗣君改元之年先君尚未及葬則先卽位而後葬先
君春秋書文成兩公可見

王孝廉云封禪書中嶽嵩高也志疑引周禮冀州山鎮及左傳
司馬侯語辨中嶽是霍山非嵩高恐不然嵩高爲中嶽自當
據爾雅史公不誤霍山在今山西故周禮指爲冀州山鎮冀
偏西北不得言中司馬侯別太室于四嶽之外者以東西南
北爲四嶽則太室之爲中嶽自在其外不得據崧高之詩以
駁爾雅

書金縢一篇今古文皆有太史公載之魯世家然先哲多疑其
僞余據淮南子金縢豹韜語疑古別有金縢之書許周生云淮南子所

謂金滕豹韞蓋卽莊
子所言金版六發
後讀宋樓鑰攻媿集有一說極爲明通
其跋金滕圖云書序武王有疾周公作金滕言金滕之篇爲
公而作也所謂金滕之匱其中寶藏占書自后稷封邰分茅
胙土授之以龜占書至嚴子孫世守非有大事不啓也啓籥
見書正啓先世金滕之匱也

鄭世家言鄭君乙爲韓所滅六國表言康公滅無後而一統志
山西平陽府翼城縣西十里有鄭太子墓唐盧照鄰銘太子
壽者康公之子桓公二十代孫聰明仁智邑封千戶今壽城
是其地年七十八薨葬天陵南此果可信則康公非無後矣
田完世家言田常有七十餘男小司馬引鮑昱云陳成子生男
百餘人後此漢中山靖王有子百二十餘人勃海王惲子女
七十人梁酈陽王恢男女百人北燕馮跋子男百餘人吐谷

渾有子六十人明代端順王奇湏生子七十人餘不多見

陳涉世家涉之爲王沈沈者劉伯莊云猶談談王孝廉云作談却不可解竊疑是淡之誤淡淡水平滿貌見高唐賦與潭亦近淡轉爲潭猶談之作譚耳

弟子傳壤駟赤桐城姚姬傳郎中名經說謂卽左傳定十年之

郈工師駟赤

趙李同死封其父爲李侯是子蔭父也平原君傳漢奚涓死封其母

疵爲魯侯稱曰母侯是子蔭母也高祖功臣表張敖賜諡爲魯元

王是夫從妻爵也呂后紀魏志郭惡爲甄氏後封平原侯是以

異姓襲殤母之爵也

樂毅傳望諸君索隱曰戰國策望作藍案藍諸君見中山策而燕策蘇代云望諸相中山使趙劫之求地望諸攻關而出豈

樂毅之前已有號望諸者乎疑燕策兩望字當作藍史索反牽引藍諸作樂毅合爲一人則誤甚矣

淮陰侯傳從閒道葦山而望趙軍葦讀曰蔽索隱引楚漢春秋作卑葢省文而顧宛溪方輿紀要謂北直真定府獲鹿縣西有抱犢山本名葦山韓信登葦山望趙軍卽此則不當作隱蔽解若訓蔽則字當从竹

倉公傳趙章病法五日死而後十日乃死其人嗜粥故中藏實中藏實故過期則食粥眞養生之要也張文潛有贈潘邠老粥記言晨起食粥之妙葢於老人尤宜

韓長孺傳於梁舉壺遂臧固邳他皆天下名士索隱曰邳音質三人姓名也漢書則云至他言至於他處亦舉名士似漢書誤嚴九能云邳作至或省文或傳譌俱未可定

衛將軍驃騎傳千騎將得王王母各一人王孝廉云得字當在千字上謂得千騎將又得王又得王母

日者傳越王句踐倣文王八卦以破敵國霸天下此事莫詳因考後書崔駰傳顏回明仁於度轂張衡傳洪鼎聲而軍容息孔融傳南睢之骨立三國蜀志秦宓云成湯大聖觀野魚而有獵逐之失晉書地理志敘世祖武皇帝接千祀之餘當八堯之禪宋書文九王建平王傳曾子孝於其親而沈乎水北周書袁長孫儉詔蕭何就窮僻之鄉其事皆未聞後書南蠻傳爲僕鑒之結著獨力之文章懷亦未詳

太史公自序傳申呂肖矣注以肖爲瘠顧亭林謂肖乃削字脫其旁耳嚴九能云方言趙肖小也肖有小義亭林似未攷方

言以上各條因史記志疑已刻不及增改故錄此

漢書武紀元封元年登嵩高聞呼萬歲者三太始三年登之吳山稱萬歲人但言嵩呼耳

元帝紀建昭五年詔有云方春農桑興百姓戮力自盡之時也今不夏之吏覆案小罪徵召證案使失一時之作亡終歲之功公卿其明察申救之今法農忙停訟蓋始于此

竟寧元年賜單于待詔掖庭王牆爲閼氏匈奴傳作王牆皆不書牆字錢宮詹云說文無牆字左傳妃嬀嬪御唐石經本作牆漢書王牆字亦从月元帝紀作牆恐是牆之譌牆字說文亦未收

諸葛堂云王牆蓋取古美人毛牆之名未必古無牆字疑牆牆牆三字古通

平帝紀元始元年六月封周公後公孫相如爲褒魯侯案表褒魯始封是節侯公子寬十一月相如嗣更氏公孫則紀誤矣王子表有金鄉侯就鄉侯皆東平思王孫皆名不害皆元始元

年二月丙辰封疑是誤重此卷表中高城節侯梁亦兩見誤出也

史漢侯表中安上侯張指坐入上林謀盜鹿園除成平侯劉禮坐恐獨取雞以令買償免侯所坐亦甚微淺何遂至于削國漢法亦太重矣惟轅陽侯江喜坐上書還印符隨方士免方張宗也其事畧見郊祀志谷永語高昌侯董宏以佞邪免後復封而其子武嗣侯又坐父前爲佞邪免宜哉

古今人表周公僞蜀乾德六年封顯聖王見寰宇記七十七下

補人表攷

仲尼宋熙寧中欲加孔子諡至神元聖帝禮臣李邦直執不可卒從其議見王明清揮塵錄又西夏仁宗仁孝嘗尊孔子爲文宣帝見宋史夏國傳

僑極亦作喬又見禮祭法疏引大戴禮

簡邊許周生云月令疏引鄭志稱爲娥簡狄詩疏譌爲流簡狄
諫菴稱後王以爲媒官謂之高禰案月令疏高禰祀簡狄之
夫而非簡狄

姬訾名常儀檀弓上疏引帝繫作阪氏之女曰常宜

女適禹妃塗山氏女生彤唐武后萬歲通天元年封塗山氏爲
玉京太后尊彤爲齊聖皇帝見舊唐書禮儀志三

傳說周生云揚子雲解嘲或釋褐而傳似以傳爲大傳之傳蓋
說稱傳說猶召公稱保夷也孟康以爲甯戚恐非

箕子其支子仲食邑於于子孫爲鮮于氏見顏真卿太子少保
鮮于仲通神道碑銘及通志氏族畧

伯夷叔齊亦曰夷叔又見蜀志郤正傳晉書羊祜傳

亦見魏志
王昶傳

太姒錢廣伯云錢田間謂太姒是文王繼娶諫菴謂姊妹全嫁于周恐未然詩云篤生武王大戴禮云文王十五而生武王則太姒爲文王元妃明甚其云文王初載者猶曰初度云爾續女維莘者卽所謂太姒嗣徽音也安得以卽位之始年當之而謂中年再娶乎況禮諸侯不再娶也

案諸侯再娶者甚多

散宜生錢廣伯云許叔重五經異義以文武賢臣有散宜生蘇忿生非公羊二字作名之說見曲禮上正義在馬融前

管仲稱仲父亦見晏子春秋諫下呂覽知接重言精論達鬱

鄭子產亦曰國產見亢倉子政道篇

顏淵妻宋戴氏見元史

孟子亦曰鄒叟見宋呂陶淨德集送范堯夫詩自注前史有謂孟子爲鄒叟者又瓦釜漫記孟子父名彥璞

尹吉甫元豐九域志墓在滄洲

宋正考父亦曰正父見初學記十七引王粲讚

魯公子季友友又作有見鹽鐵論殊路篇古字通用

百里奚九域志墓在鄧州寰宇記在南陽縣西南七里

介子推錢廣伯云史記弟子傳稱介山子裴注作介山子然誤也史本文然字屬下句家語弟子行作介子山又誤倒耳

荀林父庾信崔詵神道碑云上軍之左實用荀林

令尹子文是爲鬬穀於菟又見左僖二十年

原憲盧學士云檀弓疏稱憲子梁昭明詩中嘗稱原生李夢陽詩中又稱憲生

顏刻錢廣伯云諫菴謂史記弟子傳作顏高爲誤自無不可蓋

刻又作克

見家語曲禮子貢問

克字本作亨形似致譌也然云顏氏爲

魯望族不應竝時全名有二高恐非確論晉有二士句魯有二嬰齊夫非望族乎何必顏氏不有兩高也

段干木通考一百三卷宋徽宗時封善應侯又晉書隱逸傳宋繼曰德非莊生才非干木

伯嬰宋劉敞公是集伯問郭贊序伯問周公裔孫也

季院楊升菴丹鉛錄云蕭穎士蒙山詩尚子捐俗氛季隨躡遐軌季隨即八士中一人蒙山有季隨隱跡事未知所出

王青二友未詳金壇段明府玉裁云漢藝文志有王史氏禮在有

青史子說直小大戴禮記保傅篇作青史氏或表當作王青二

史歟蕭山徐北溟鯢曰漢志王史氏乃六國時人與表不合

且表中無此例懋堂說不可從

狐突說苑立節謂獻公卒狐突自殺與傳異

公孫杵臼九域志墓在絳州

宋子罕劉孝標稱為罕生

此補五等鄭子皮誤為宋子罕

陳不占孟子不虞之譽章注作不瞻聲相近

毛本作瞻誤

老子唐書則天后光宅元年追尊老子母為先天太后

伍子胥唐昭宗景福二年封廣惠侯

一云唐封廣衛錢武肅王奏改惠應旋晉吳安王

宋真宗大中祥符五年賜忠清廟額封英烈王徽宗政和六

年加封威顯高宗紹興三十年加封忠壯

一云改封忠壯侯

寧宗嘉

定十七年累封忠武英烈威德顯聖王

一云忠武英烈王顯聖安福王

元封

順祐

一作佑

忠孝威惠

一作德

顯聖王雍正三年改封英衛公

宋嘉

熙三年曾建英衛閣理宗御書

見嵇曾筠浙江通志李衛西湖志

計然名研本又作妍

何薺許周生云徐楚金說文通論上稱為擁纒子未詳所據

告子錢廣伯云趙臺卿孟子注未嘗認告子卽浩生不害固別爲一人也僞疏疑浩生不害爲告子耳諫菴謂趙氏兩注元有牴牾未免臆斷又孟子曰告子先我不動心則是孟子弟子而年亞於孟子可知孟子於弟子稱子顧亭林曾言之若以孟子稱曰告子疑非弟子則樂正子二之中又何說經史問答謂告子或有二名否則其一爲字

郭隗九域志墓在德州

白起唐書德宗貞元四年咸陽人上奏臣見白起云正月吐蕃必大下當爲朝廷破之已而果爲邊將所敗上欲立廟贈以司徒李泌以爲太重請贈兵部尚書

魯叔孫昭子卽叔孫婁公羊經婁作舍毛氏簡書刊誤非之錢廣伯云舍乃婁聲之轉觀巷字自明

楚伍奢伍尚宋理宗嘉熙三年封奢烈侯妻嘉應夫人尚昭順侯妻淑惠夫人見李衛西湖志十五

榮薛期陶潛集詠貧士稱榮叟亦云年九十又稱榮公飲酒一

荆軻海寧吳槎客騫云軻墓九域志京兆府河中府竝見蓋招魂而葬或不止一處歟

宋襄公與楚戰傷股七月而死韓子外儲說左上三日而死淮南泰族訓軍敗君獲竝誤

樂陽古陽羊通用漢書五行志上武五子公孫賀江充傳武帝女陽石公主卽

北海郡羊石縣也淮南記論梟陽說文作梟羊後漢書光武紀建武九年都陽馬援傳作都羊

秦武陽史記匈奴傳燕將秦開之孫

鄭子亹又作子亹釋文或作亹余弟左通云亹亹字相狀轉寫致譌

齋款蓋卽艾孔錢廣伯云艾音父與齋音近款孔聲近嚴九能云爾雅艾歷相也方言齋歷相也亦齋艾聲近之證

宋桓魋皇侃論語義疏本引包咸注曰桓魋宋司馬黎也黎字疑誤增司馬牛名犁不應全之

象亦曰象敖見大戴禮帝繫象爲人傲狠因以爲號後漢書劉表與袁譚書曰重華之於象敖

劇辛吳槎客曰辛何以在第八

蚩尤九域志冢在京兆府

王子帶亦曰叔帶見左傳昭廿六年

蒯聵師古曰蒯音五怪反錢廣伯云釋文蒯苦怪反聵五快反此蓋全之今譌脫爾此有師古注八卷中無之而簡公之謚無攷復列在石乞狐偃之黨後不若此從其君父君母之得

其所也疑彼是後人誤增

律歷志引六國春秋不知誰作藝文志不載又引漢志曰歲在大棣此志是班氏以前之書藝文志無之大棣之名亦異商之少王毛鄭韋注商頌國語皆云契也而漢書禮樂志曰商稷始生少王公劉師古謂非一人豈班堅以玄王爲冥乎冥勤其官而水死殷人郊焉

地理志引邯鄲曰河水洋洋師古謂無此句抱經學士云洋當作泮從楚姓之芊與潏全甚確

地理志交趾郡有安定縣三國蜀志張嶷傳及晉書地理志全而司馬彪續志與魏志陳畱王咸熙元年詔竝作定安疑誤新莽更改天下郡縣名目最爲可笑班志元可不載蓋志據平帝元始言之故附注焉然亦有不注者如莽傳益歲以南付

新平蘇林曰陳畱閼縣莽改曰益歲

國志屬淮陽

後書邳彤傳注

引東觀漢紀云莽分鉅鹿爲和成郡居下曲陽志竝無之豈傳寫脫歟

五行志引昭廿五年傳遠哉搖搖師古注不安之貌今本左傳作遙蓋搖之俗體說文無遙字

五行志建元六年遼東高廟及高園便殿災董仲舒上言宜誅親戚近臣視災之甚不甚爲輕重此豈醇儒之語哉爲忌者所奏下吏幾死固其自取也好談災異未免流爲讖緯故其治春秋獨信公羊多違聖旨

五行志哀帝封外屬丁氏傅氏周氏鄭氏六人爲侯案恩澤表外戚傳皆無周氏且侯者丁二人傅三人鄭一人已足六人之數志誤增周氏宜衍

宣帝神爵時以方士言立隨侯

珠劍寶劍也

玉寶璧

傳國璽也周康

寶鼎

汾陽鼎也

四祠於未央宮中見郊祀志劍鼎二物或以爲神

而祠之珠玉何爲者明太祖封舟索爲髯三爺立廟致祭見

夏原吉一統肇基錄全一異聞

溝洫志白渠歌漢紀決渠爲雨下有水流竈下魚跳入釜二句

蓋班氏刪之

史漢於諸帝之名每不盡避蓋失檢校耳然有不可解者班氏
刑法志引周禮大司寇文曰刑新邦用輕典刑平邦用中典
刑亂邦用重典反改國爲邦何也豈周禮元文是邦字後人
避諱改國孟堅引元文而未改歟又史皇孫進宣帝父也而
宣帝賜陳遂璽書有博進語見陳遵傳漢紀云可以償遂博負矣豈臨文不諱
之故歟

食貨志宣帝時穀至石五錢粟賤之極無過于此

史記律書言孝文時粟至

十餘錢或斗或斛未明

嗣後惟東漢虞詡爲武都太守三年米石八十

唐貞觀間米斗四五錢

梁天監四年米斛三十又唐天寶初米斗錢十三青齊間米斗三錢

藝文志言文帝得魏文侯樂人竇公孟堅不言其年顏注引桓

譚新論云年百八十歲案魏文侯在位三十八年卒于周安

王之十五年竇公爲樂工時當不甚幼而獻書文帝又未必

在卽位之初卽以安王十五年至文帝元年計之已二百十

歲矣張懷瓘書斷謂竇公至文帝世二百八十歲孫頤谷云

新論當是年二百八十歲脫去二字耳書斷政用桓語

志載經方十一家引諺曰有病不治常得中醫今俗言不藥爲

中醫本此

藝文志小說家及後書蔡邕傳引子夏小道可觀致遠恐泥語

竝以爲孔子不應班蔡皆誤引章懷疑別有所據豈古論語與今本異歟不特此也說苑建本篇引有子君子務本二句論衡語增篇引子貢紂之不善二句後書章帝紀建初四年詔引子夏博學而篤志三句唐書孔穎達獨孤及傳引曾子以能問於不能四句蘇文忠上皇帝書引子夏信而後勞其民二句再上皇帝書引子貢日月之食數句俱以爲孔子語豈盡古本之異乎錢詹事嘗曰藝文志云論語者孔子應答弟子時人及弟子相與言而接聞於夫子之語也云接聞於夫子則其言皆孔子所取矣故漢人引論語雖弟子之言皆歸之孔子非由記憶之誤此說極明通

膠鬲之姓甚少漢武帝時有趙人膠倉與朱買臣莊忽奇等待詔金馬見嚴助東方朔傳而藝文志作聊倉疑以音近而異

廣韻引風俗通亦作聊倉蓋仍漢志未必是兩人

賈誼傳弔屈原曰謂跼蹐廉莊蹻楚之大盜卽其後王滇者困

學紀聞以爲兩人竊怪王滇之莊蹻與盜全名恐不然也後漢

梁竦亦沈書以悼屈原

淮南王傳欲以親戚之意望於太上匡衡傳太上者民之父母

文選班固辟雍詩於赫太上王褒四子講德論太上聖明是

天子亦稱太上不獨稱天子之父也又後書李膺傳上帝震

怒貶黜鼎臣則天子亦稱上帝矣

谷永傳日食地震對引經曰亦惟先正克左右先正今尚書有本作先王語

師古云周書君牙之辭也君牙乃僞古文谷子雲安得見之

又黑龍見封曰泰所以二世十六年而亡案自始皇二十六

年并天下至二世三年亡凡十五年永謂十六年誤杜牧阿

房宮賦有不得見者三十六年始皇爲王二十五年爲帝十

二年當作三十七年牧之亦誤

陳恭甫太史云谷永引文侯之命非君牙也

李尋傳成帝時齊人甘忠可詐造天官歷包元太平經十二卷

則讖緯不始于哀平藝文志有執不祥劾鬼物八卷則符籙

不始于張陵

楚辭王逸九懷引用緯文史記伯夷傳或曰天

解引易曰差若毫釐謬以千里蓋皆易緯並在成帝前

戾太子傳壺關三老茂不書姓小顏引漢紀姓令狐而漢武故

事又作鄭茂未知孰是至水經注卷十謂壺關三老公乘興

乃誤以訟王尊之湖三老爲茂耳梁元帝全姓名錄依漢武

故事作鄭茂

武五子傳贊曰建元六年蚩尤之旗見其長竟天後遂命將出

征畧取河南建置朔方其春戾太子生東坡代張方平諫用

兵書述其語余疑其春是其時之誤蓋戾太子生于元朔元年後建元六年幾八載而元朔二年開朔方郡又在戾太子生後也

孝武栗太子戾園史皇孫齊紀翁主淮南蓼太子皆以母姓爲別非冒母姓也扶柳侯呂平乃呂后姊子是冒母姓矣而最奇者夏侯嬰曾孫頗尚平陽公主主隨外家姓號孫公主嬰之子孫更爲孫氏是以母之母姓爲姓并自改其姓也

杜欽傳言欽繼功臣絕世蓋指成帝紹封蕭何後事也而功臣表序以爲其子杜業疑業字誤

王嘉除舊律爲輕刑此盛德事見後書梁統傳不知班史何以

不載章懷亦疑之

孝和時陳寵鉤校律令
條法益於前刑者除之

梅福傳出爵不待廉茂廉孝廉也師古以爲廉吏恐非梅福追

述孝文之美蓋緣孝文時未嘗舉孝廉舉茂才也若如師古
解不待廉吏而舉之不可通矣稱孝廉茂才爲廉茂猶抱朴
子審舉篇魏書高祖紀隋書禮儀志稱秀才孝廉爲秀孝也
梅福上書成帝謂封孔子之世以爲湯後足以得嗣未免迂濶
孝成非不男也後宮殺之耳宋吳處厚因神宗儲位屢闕上
書乞封程嬰公孫杵臼韓厥其事政全

鼃錯傳注晉灼錯音厝小顏引申屠嘉傳序責通請錯匪躬之
故作證以晉音爲是以潘岳西征賦讀錯雜之錯爲非案鼃
之名無義可尋安見潘非而晉是故史索曰錯音厝一如字
讀

經典中鰥寡之鰥多作矜而矜無作鰥者惟于定國傳贊云哀
鰥哲獄然師古作如字解

袁盎傳盎兄子種謂盎曰吳王驕日久國多姦今絲欲刻治彼
不上書告君則利劒刺君矣南方卑濕絲能日飲亡何說王
毋反而已兩稱叔父之字可乎凡子孫稱祖父之字皆在卒
後未有生而稱之者晉書胡毋謙之傳呼其父字曰彥國年
老不得爲爾外戚傳王濛字其父曰王文開生如此兒耶放
誕不羈不可爲訓

唐書明皇王皇后曰陛下獨不念阿忠脫
紫半臂易斗麪爲生日湯餅耶阿忠后呼

其父仁
政云

孝景子膠西王端一近婦人病之數月梁宣帝惡見婦人雖相
去數步遙聞其臭經御婦人之衣不復更著史書中惟見此
二人

揚雄傳解嘲注應劭曰漢律以不爲親行三年服不得選舉此
律未知何時所定蓋爲未入官人立法二千石以上不用此

律

後書劉愷傳舊制公卿二千石刺史不得行三年喪元初中鄧太后詔長吏以下不爲親行服者不得典城選舉

漢制自文帝遺詔以日易月後遂爲常故翟方進後母終既葬三十六日除服起視事自以身備漢相不敢踰國家之制也至哀帝時博士弟子父母死子寧三年後漢安帝元初三年初聽大臣二千石刺史行三年喪建光元年斷之桓帝永興二年又聽刺史二千石行三年喪服延熹二年復斷之而原涉行父喪三年顯名京師河間惠王良行母喪三年下詔褒揚蓋亦絕無而僅有者矣

王莽爲母服總更奇

羽獵賦文王圍百里齊宣王圍四十里後書楊賜傳樂松曰文

王之圍百里齊宣王五里

疑五下脫十字袁宏後紀作五十里

皆與孟子不全

又陳蕃諫校獵疏云齊景公欲觀於海放乎琅邪晏子爲陳百姓惡聞旌旗輿馬之音舉首顰眉之感景公爲之不行此

誤合孟子兩章爲一而以孟子之言作晏子語也章懷三劉
竝未糾駁楊秉傳春秋不誅黎比而魯多盜蓋誤以莒君之
名爲邾庶其章懷謂別有所據恐非

長楊賦奉太宗之烈文帝爲太宗與下句遵文武之度複當依
文選作太尊李善曰謂高祖然則今俗稱太守爲太尊謬矣
李廣傳諸妄校尉已下張晏曰妄猶凡也郭聚五云史記作諸
部校尉似是妄恐誤妄之解凡恐亦意爲之耳

史通雜說篇言太史公與任安書論自古刑餘之人惟以彌子
瑕爲始案書中竝無子瑕而子瑕亦非閹宦豈劉氏誤以雍
渠爲彌子乎

外戚傳上官安與父諸良人亂師古曰良人妾也案本傳序良
人是天子妾號秩比八百石安父桀雖封侯亦人臣爾何以

稱之

西域傳鄯善國至山國千三百六十五里師古曰此國山居故名又云山國王去長安七千一百七十里師古曰常在山下居不爲城治也案水經注河水二東逕墨山國南治墨山城則漢傳脫墨字趙誠夫水經注釋言之可補班氏之闕文政小顏之曲說

孝文帝賜南粵王書云終今以來通使如故今作文習用離騷終古未見有用終今者

王莽密淫祀以雞當鶩雁犬當麋鹿

漢書郊祀志

梁武帝郊廟牲牷

皆代以麋其愚僞一也金世宗節儉重農宗廟之祭以鹿代牛見本紀上又不可以爲比矣

漢書敘傳述西域云總督城郭三十有六後世官制有總督二

字見此

後漢書靈帝紀熹平四年三月詔諸儒正五經文字刻石立于太學門外蔡邕傳熹平四年邕與五官中郎將堂谿典光祿大夫楊賜諫議大夫馬日磾議郎張馴韓說太史令單颺等奏求正定六經文字靈帝許之邕乃自書丹於碑使工鐫刻立太學門外而水經穀水注云靈帝光和六年刻石鐫碑載五經立於太學講堂前悉在東側蔡邕以熹平四年與五官中郎將堂谿典光祿大夫楊賜諫議大夫馬日磾議郎張馴韓說太史令單颺等奏求正定六經文字案熹平在光和前光和時不聞有鐫經之事至序邕等七人舊本多誤今依趙氏定本增補楊升菴石經考謬信鄭注謂有初刻再刻趙岫石墨鐫華妄依其說朱氏彝尊經義考曰熹平刻石光和

立石先後總屬中郎所書非再刻也此說本洪景伯隸釋但

昔人傳漢石經之不全有二焉後書靈紀及儒林宦者傳袁

宏後紀北史江式傳皆以爲五經邕傳及張馴傳鄭樵通志

郭忠恕汗簡則以爲六經水經注隋唐志又以爲七經愚意

稱七經爲是章懷瓘傳注引洛陽記祇有易書公羊論語禮

記趙明誠金石錄述其家所藏有詩儀禮此七經之證董道

廣川書跋斷以爲七經誠有見也定經之儒後書是七人黃

伯思東觀餘論及隸釋俱言論語碑末別有孫表與博士左

立二人又有刻者公羊碑末別有諫議大夫趙陟議郎劉弘

郎中張文蘇陵傳植五人陶宗儀書史會要謂皆熹平中奉

詔正定諸經者孫表官然則蔚宗所記姓名僅得其半而七

經文字亦非伯喈一人獨書矣孫頤谷云竊意熹平時奏求

經也當以范書章懷注爲據其詩儀禮疑是魏世
所刻耳杜詩苦縣光和尚骨立光和卽指石經

熹平五年冬十月壬午及中平五年冬十月壬午本紀皆書御
殿後槐樹自拔倒豎時月日皆全改元之年又全眞大妖異
也或疑史誤重亦未可知

靈帝好學自造皇義篇五十章今不傳拾遺記載帝招商歌甚
工居然爲梁陳隋煬宋徽諸君之先驅矣本紀及何進傳言
帝耀兵平樂觀自稱無上將軍與明武宗稱威武大將軍何
異但攷祭遵傳光武建武三年涿郡太守張豐反自稱無上
大將軍滕撫傳順帝建康元年陰陵人徐鳳稱無上將軍此
皆近世事豈未之聞乎

鉅鹿張角稱天公將軍弟寶稱地公將軍梁稱人公將軍蓋古
者司馬主天司空主地司徒主人謂之三公故取以爲號

靈帝紀論靈帝之爲靈也優哉蓋用莊子則陽篇靈公之爲靈也久矣句法而皆本左傳君子是以知靈公之爲靈也句來劉盆子傳擊王莽探湯侯田況注莽改北海益縣曰探湯今漢志各本皆作探陽水經巨洋水注又作滌蕩疑陽與滌竝傳寫之誤湯蕩古通金城郡允吾允街二縣注皆云莽曰修遠亦必有一譌

盆子傳城陽景王之後西安侯劉孝案前志齊郡西安失注侯國而王子侯表西安侯勝城陽荒王子孝元初元元年三月封哀侯守嗣薨亡後各本西字譌要則劉孝必是以支屬續封其年月無考矣

劉永傳西防賊帥山陽佼彊章懷注西防縣名故城在今宋州單父縣北胡梅磧謂兩漢志無西防縣錢詹事云前漢志山

陽郡有西陽縣疑是西防之譌

章帝八王傳千乘王伉之孫孝王鴻薨無子梁太后立河間王
開之孫蠡吾侯惲奉鴻祀以從兄弟爲父子奇矣此皆緣公
羊仲嬰齊爲兄歸父後一言遂令後世有亂倫妄繼之事五
代晉高祖以弟剡王爲子故其名與諸子排行宋史周三臣
傳李守節無後以父妾劉氏所生之弟爲嗣

陳元請立左氏疏稱宣帝爲淵聖此宋人所本

徐防傳詩書禮樂定自孔子發明章句始於子夏案卜子有詩
序儀禮有喪服傳樂記有與魏文侯論樂獨未聞於書有說
也又隋書經籍志有子夏易傳孔氏易正義引之

朱儁察孝廉舉進士見吳志孫堅傳注引續漢書范史本傳不
書儁舉進士

劉寬不好盥浴京師以爲諺此人性之異嵇叔夜十五日不洗頭面陰子春數年一洗腳政復相類不得以四首喪面而談詩書之王安石比也

文苑補衡傳漁陽參撾章懷注音七甘反引文士傳撾作槌謂槌撾竝擊鼓杖參撾是擊鼓之法而王僧孺詩散度廣陵音參寫漁陽曲自音云參七紺反及後文人全用不知何所憑也案魏志荀彧傳注世說言語篇注俱引張衡文士傳與章懷所述小異如裴松之注前作槌後作撾劉孝標注前作撾後作槌而參又加手作摻文人仍用多全王音無作平聲者如庾信夜聽搗衣詩玉堦風轉急長城雪應闌聲煩廣陵散杵急漁陽摻隋煬帝詩今夜長城下雲昏月夜暗誰見倡樓前心悲不成摻唐李頎詩忽然更作漁陽摻黃雲蕭條白日

暗李商隱詩欲問漁陽慘時無禍正平又詩必投潘岳果誰
慘禍衡擿蓋參者猶曰散曰引曰操曰弄之類擿槌竝訓擊
不作鼓杖解參擿乃擊鼓曲調禍生當有所受或言本作漁
陽操改爲慘字亦非若依李賢作七甘反則鼓僅三擿訕然
而止安得音節悲壯聲出金石使四坐爲之忼慨耶

昔人譏范史列女不傳秦嘉妻徐淑而傳蔡琰余謂蔡邕有二
女其一適羊祜之父賢而知義不知蔚宗何以舍祜母而載
祀妻棄行取文未免倒置又酷吏亦不當入董宣樊仲華李
章陽球此四人者廉明剛正未見其爲酷也

東夷傳倭國俗皆徒跣以蹲踞爲恭敬晉書四夷傳林邑國人
皆裸露以黑色爲美情事之相反如此

晉惠南風劉琨媚
豬皆以黑爲美也

魏明帝諡山陽公爲孝獻皇帝蜀先主諡漢帝爲孝愍皇帝蔚

宗作史似宜從蜀晉書劉元海載記其僭立漢王令稱孝愍也蜀志丞相亮追諡甘皇后表稱孝愍皇帝

陳承祚作史諱宜景文三王之名而高貴鄉公陳留王二紀獨直書武帝之名惟于孫叔然稱字以諱之又韋昭改稱韋曜而董昭胡昭張昭不諱殊不可解杭董浦太史以爲仍舊史之文也

魏志劉劭傳黃初中受詔集五經羣書以類相從作皇覽而楊俊傳注引魏畧言王象受詔撰皇覽兩處不全當是劉王共纂成之乃隋志云皇覽繆卜等撰又有何承天徐爰合本蓋仍魏之舊各漸增加唐以後書中所引大抵皆何徐合本故唐志祇載何徐皇覽也

魏文德郭皇后明帝後母也后傳注載哀策云哀子皇帝窾哀

子之稱見此士虞禮及禮雜記凡虞以前之祭稱哀子非對母而言也又陳書孝行謝貞傳孤子疊禍所集錢詹事云貞以母憂去職父已先亡而自稱孤子可證溫公書儀母亡稱哀子唐以後始有之似忘攷裴注蔡邕袁夫人碑哀子懿達父在魏前郭淮封汾陽子是古今有兩郭汾陽矣然有再造唐室之汾陽王而伯濟之勳不足言也

司馬懿諡宣文晉書文帝紀及禮志可據宋書禮志三全而宣帝紀云諡文貞後改文宣恐誤

袁紹傳注引漢晉春秋載審配獻書袁譚曰先公廢紉將軍以續賢兄立我將軍以爲適嗣先公謂將軍爲兄子將軍謂先公爲叔父此本生父母不稱父母之證又樓攻媿集承議郎孫君墓誌銘述其父雪齋自誌其墓云余祖生四子次爲十

三伯父次先考十七府君余實十三伯父之子命以爲先考
嗣七歲聞本生伯母及先考之訃程子曰爲人後者謂其所
後爲父母謂其所生爲伯叔父母此天地之大義生人之大
倫百世不可變易也濮安懿王稱親當時歐陽公倡議以誤
韓魏公因以誤天子其實歐陽公引喪服大記爲據非妄也
殊不知六經惟禮最雜大記非周公之典何足依信服則降
之名則存之其說自相矛盾矣

紹傳注監軍之計計在持牢范史紹傳作將牢疑持字誤晉書
姚萇載記陛下將牢太過耳可證

賈逵少孤爲齔池令以喪祖父去官州泰頻歲喪考妣祖九年
居喪宣王畱缺待之鄧艾晉書鄧攸七歲喪父尋喪母及祖
母居喪九年以孝致稱宋史孫覺以祖母喪解官史書中言

承重孫持服甚少故著之又宋楊傑劉之道墓誌銘遭祖母喪乞解官承重服開國以來嫡孫有諸叔而承重者自之道

始汪藻浮溪集右文殿修撰趙億墓誌銘丁祖母時氏憂卒

喪除太僕寺主簿

又宋史石豫傳祖母死用嫡孫承重去官趙汝談傳持祖母服

何平叔不解易中九事見魏志管輅傳注南齊書張緒傳及南史竝以爲七事誤也梁書伏曼容傳亦云九事世說全

魏志東夷傳沃沮國女至十歲婿家卽迎之長養爲婦此卽今養媳本夷俗也

翟晴江嘗云陳承祚三國志紀魏而傳蜀習彥威漢晉春秋繼漢而越魏非關其識之有高下也時也承祚撰志於晉武受禪之初晉受魏禪魏之見廢蜀已破亡安得不尊魏乎彥威著春秋於元帝中興之後蜀以宗室而存漢緒猶元帝以藩

庶而復晉統安得不尊蜀乎司馬公通鑑朱子綱目理勢亦如是也北宋受周禪司馬公不得不以魏爲正統南渡偏安朱子不得不以蜀爲正統陳與習司馬與朱子易地則皆然蜀志陳震傳載孔明與蔣琬董允書曰孝起爲吾說正方腹中有鱗甲鄉里以爲不可近案御覽四百九十六引江表傳曰李嚴少爲郡職吏用情深剋苟利其身鄉里爲嚴諺曰難可狎李鱗甲陳孝起之言本此

龐德公之子字山民娶孔明小妹見蜀志龐統傳注引襄陽記而後書逸民傳注引襄陽記山民作山人因避諱也而云娶孔明姊與裴注不全

孔明讀書但觀大意淵明讀書不求甚解此但可爲中人以上言之非中人以下所得妄託也

張飛字益德見飛本傳及楊戲傳錢宮詹金石文跋尾續有金承安四年重修蜀先主廟碑亦作益德并云俗傳三國演義譌爲翼錢遵王謂內府板演義猶未譌日下舊聞載此碑譌翼蓋朱得之傳抄也余案華陽國志水經注世說品藻上篇竝作翼德豈近代刊本之譌歟

放翁集涪州道中詩自注鄧境有張翼德祠亦作翼

張疑得疾困篤家貧置廣漢太守蜀郡何祇名爲通厚疑宿與疎濶乃自舉詣祇託以治疾祇傾財醫療數年除愈此種風義雖古人亦不多見近日畢尚書沅之待程太史晉芳庶幾似之

明吳寬傳友人賀恩疾遷至邸旦夕視之恩死爲衣素一月

秦宓傳宜一來與州尊相見今稱太守曰府尊令曰縣尊故曰州尊此其始也而府尊縣尊之稱未考

吳大和五年大興寺鐵鑪款識府尊

楊戲傳贊馬承伯注姚仙字子緒亦聞中人先主定益州復爲

功曹復字一本作後恐竝譌當作佻


蜀志終於楊戲以其著季漢輔臣贊可備逸事諸臣髣髴也虞翻傳注載會稽典錄朱育對濮陽興一則亦足備吳事之逸吳志賀齊傳齊斬楊松長丁蕃而虞翻傳注引會稽典錄有節女松楊柳朱楊松當卽松楊誤倒耳蓋卽今之松陽吳分章安置松陽縣古字楊陽通用

孫皓封后父滕牧爲高密侯注引吳歷曰牧本名密避丁密改名牧丁密避牧改名爲固虞翻傳引會稽典錄亦云丁覽子固字子賤本名密避滕密改作固二人不應互相避名疑滕因封高密改名丁乃避滕改也

孫休使察戰到交阯調孔爵大豬裴云察戰吳官號今楊都有察戰巷案晉書陶璜傳察戰鄧荀至交阯擅調孔雀三千頭

爲郡吏呂興所殺

陳畱王紀作
鄧句疑誤



清白士集卷二十一

梁玉繩

瞥記四 史

晉書簡文帝紀咸安元年有魏郡太守毛安之冠軍將軍毛武生案毛寶傳寶二子穆之安之穆之字憲祖小字武生名犯王靖后諱故行字後又以桓溫母名憲更稱小字此當時之稱今以小字書于帝紀似非史法本傳固云穆之也

晉惠帝時天下荒亂百姓餓死帝曰何不食肉糜遼主疑天聞

民間乏食謂何不食乾脂

見金世宗紀

庸暗一轍又蝦蟆官私之

對晉書不言其人據水經穀水注引晉中州記是賈胤且令

曰若官蝦蟆可給廩晉書亦不載

因學紀聞十八載江藻詩傳有乘軒蛙給廩

地理志秦始皇并天下置郡會稽九江三郡項羽封英布九江王盡有其地案鄣非秦郡劉敞於漢志丹陽郡辨之甚悉疑

楚漢之際分置觀高帝紀以鄣郡與東陽吳郊並言可見而英布只封九江何曾盡有三郡之地乎

輿服志序言漢世祖以幸姬趙飛鸞置屬車間豹尾中是武帝時先有趙飛鸞矣疑卽鉤七夫人之名

輿服志宋書禮志耕根車天子親耕所乘東京賦所云農輿輅木也或以爲卽金根車大謬

食貨志獻帝作五銖錢有四出案漢靈帝紀中平三年鑄四出文錢則晉志言獻帝誤

晉宋五行志載惠帝元康五年武庫火累代異寶如王莽頭孔子履諸物一時蕩盡莽頭不足爲異寶孔子之履固可起敬起愛者也天火取之萬世而下將不得考聖人之跡矣然元楊瑀山居新話大都鐘樓街富民家藏宣聖履又元王文定

公惲秋澗集有孔履記言中統三年五月獲觀孔履于先進
趙公學舍履長尺二寸記其形制甚悉豈流傳不止一履耶
元帝四王傳成帝詔以小晚生奕繼東海哀王冲蓋晉時呼子
爲晚生故元帝於琅邪王煥令曰晚生矇弱奕卽廢帝海西
公是哀王從孫故云小晚生

和嶠傳載庾敳歎嶠森森如千丈松雖礪何多節目施之大厦
有棟梁之用案庾敳傳子嵩所器者乃溫太真非和長輿也
因二嶠名全遂誤屬於和前後雙載世說亦誤

閻續傳楊駿誅續要潘岳崔基等共葬之駿從弟模告武陵王
澹將表殺造意者仁和張氏燭曰駿傳誅親黨夷三族安得
有從弟在且人葬其兄而告之亦非人情駿爲賈后所害則
模者乃后族兄賈模耳此語甚的諸楊不聞有楊模史稱賈

模豫誅楊駿封侯則其爲買模明矣煢字曦亮著讀史舉正
八卷

王衍傳石勒使人夜排牆填殺之案水經渠水注引晉陽秋言
勒追東海王越縱騎圍射尸積如山王夷甫死焉是衍死於
射也

隱逸夏統傳子路見夏南憤恚而忼慨日知錄謂夏當作衛是
也獨怪仲御惡見丹朱巫舞而爲賈充操柁作歌何歟雲霧
杳冥風雷響集亦未免增飾太過

藝術傳佛圖澄令一童子絜齋七日取麻油合臘脂躬自研于
掌中舉手示童子粲然有輝童子驚曰有軍馬甚衆見一人
長六白臂以朱絲縛其肘澄曰此卽曜也錢詹事云今俗傳
圓光之術蓋出于此

十六國春秋北涼沮渠蒙遜謂郎中劉炳曰昔魯人有浮海而失津者至於澶洲見仲尼及七十子游于海中與魯人一木杖令閉目乘之使歸告魯侯築城以備齊寇魯人出海投杖水中乃龍也荒誕不經此蓋因孔子浮海之言而偽造之宋書禮志二禋或用秋劉楨魯都賦素秋二七天漢指隅人胥祓除國子水嬉是用七月十四日也案二七謂七月七日志似誤說

符瑞志引金雌詩南齊祥瑞志引金雄記隋志郭文金雄記一卷亡而不及金雌詩攷雲笈七籤洞仙傳詩記言晉河內軹人郭文舉著書箬葉上晉書隱逸傳郭文字文舉

謝靈運傳載山居賦并自注載之乃史例之創見者魏書張淵傳載觀象賦北齊書顏之推傳載觀我生賦有自注全竹汀

詹事云陳壽載楊戲季漢輔臣贊有注又在宋書之前

袁淑荅彭城王義康問年云鄧仲華拜袞之歲又云陸機入洛之年義康曰身不讀書無爲作才語見向案鄧禹拜大司徒封鄴侯年二十四陸士衡年二十吳滅太康末入洛年三十矣淑兩語不全究莫知其年幾何蓋先自參錯也今有問其年而以甲子對者尚須計算況援引故事豈能卽曉才語見向實應且憎勿徒笑彭城不讀書也

宋劉穆之耳目手口齊舉固是異人後此惟北齊唐邕手口耳並用隋劉炫左畫圖右畫方口誦目數耳聽五事全舉庶幾似之

後漢陸績賦民餘口說六百餘人姓名無有差謬應

魏明帝雖左右小臣官簿性行各跡所履及其父兄子弟一經耳目終不遺忘其強記亦罕觀也

陶淵明傳言所著文章皆題年月義熙以前則書晉氏年號自

宋以來惟云甲子而已南史因之考陶集除桃花源詩序祭程氏妹文二篇外無標晉年號者晉書隱逸傳及梁昭明撰淵明傳皆無此語是也蓋年號之或書或不書隨意所在何足以論陶公集中有祭從弟敬遠文政當義熙之七年奚不稱義熙年號惟云歲在辛亥而已哉沈約李延壽之言不足信矣宋史劉豫傳載豫僭位時朝奉郎趙俊書甲子不書僞號殆欲效靖節而誤者爾

南齊書江數傳間世立後禮無其文荀顗無子立孫鑒禮之始晉書顗以此事今習行之不知其非也韓无咎周待制自強從孫微嗣離亭無後公以子嗣之此事今習行之不知其非也韓无咎周待制自強

王僧虔傳太祖與賭書畢謂曰誰爲第一僧虔曰臣書第一陛下亦第一南史全張懷瓘書斷引南史云臣書臣中第一陸

下書帝中第一語似勝

王僧虔誠子書云汝開老子卷頭五只許未知輔嗣何所道平叔何所說馬鄭何所異馬鄭未嘗注老王西莊光祿云老子當作老易蓋是也

周彥倫傳言何季精信佛法無妻妾南史直云無妻案梁書處士傳何疾妻江氏夢神告之曰汝夫應獲延期爾當代之南史全則何非無妻但無妾耳且傳稱其子撰有父風無妻妾得有子齊書高逸傳不載江氏及子撰事豈欲實其無妻之說故刪之歟南史抄撮齊梁二書未曾檢勘遂岐出也

梁書劉孝綽傳衆惡之必監焉衆好之必監焉蓋思廉避父諱改之而史通惑經篇引論語云衆善焉必察之改好爲善非開避諱豈論語有別本耶

武帝天監七年詔雉兔有刑姜宣致貶蓋用孟子而誤者當作麋鹿有刑齊宣致貶帝號博學亦有此誤

蕭子範傳南平王使製千字文甚美王命記室蔡遠釋之而今獨傳周興嗣豈以成之一宿爲奇乎然此兩千字文所說不全隋志千字文有蕭子雲胡肅二注子雲所注當是其兄子範之作而不云蔡遠興嗣本傳言次羲之書而宋史李至傳以爲鍾繇書也御覽引梁書武帝取鍾王真跡授周興嗣令選不重複者千字韻而文之又隋書文苑傳潘徽爲萬字文唐藝文志有演千字文五卷

顏氏家訓養生篇侯景之亂鄱陽王世子謝夫人登屋詬怒見射而斃夫人謝遵女也世子名嗣梁書言嗣中流矢卒於陣不及其妻南史但云妻子爲任約侯景將所禽此可補史闕

止足傳稱宋書止足傳有羊欣王微檢沈約宋書欣微在列傳

二十二亦無止足名目攷隋志宋徐爰齊孫嚴皆撰宋書蓋姚氏所言非指沈書也至隋書閩昆傳云語在輿服志何稠傳云事見威儀志而隋書無二志之名乃因修史非出一手失於校改或謂今本隋書闕此二志妄矣

諸夷傳大同五年迎佛髮于扶南人競談唐迎佛骨無言梁武迎佛髮事不及十年而臺城禍至矣因考唐憲宗元和十四年迎佛骨鳳翔次年遂有宏志之變懿宗咸通十四年復迎佛骨七月崩真不祥哉

梁臨川王宏南史極言其喪師謀逆黷貨無厭而梁書本傳皆削不書稱其爲長者豈有意諱之歟通鑑從南史

南史孔琇之清約爲臨海太守還獻乾姜三千斤南齊書作二十斤以武帝嫌其少推之疑南史誤

南史儒林王元規傳姻不失親古人所重徐楚金說文繫傳通論亦作姻見妻字注蓋因姻古通不別作婚姻解故陳書元規傳仍是因字

姚思廉作陳書以其父姚察與江總全傳蓋以總有文名爲當時推重也然傷于浮豔日從後主游宴共陳暄孔範等爲狎客君臣昏亂以至滅亡豈可屈父爲伍徐陵名高一代每見察製述尤所推重稱其德學無前則思廉何不以察與徐陵全傳乎蕭子顯豫章王嶷之子也而其作齊書比父于周公則又過矣

徐陵弟孝克至孝嫁其妻臧於侯景將孔景行以供養所生母陳氏遂剃髮爲沙門後景行死臧脫歸孝克還俗更爲夫婦居錢塘佳義里此亦事之僅見者固與朱買臣之妻異已

魏氏托跋魏書言北俗謂土爲托謂后爲跋故以爲氏南齊書言魏是李陵後匈奴女名托跋妻李陵其俗以母名爲姓二說不全然皆非也 御製全韻詩魏太武一篇注云拓跋氏居於北漠當爲蒙古部落拓跋自係蒙古語之圖卜謂正及中也

魏書北史實君傳言昭成帝因實君作亂暴崩蓋驚悸而死未定是其子實君弑之故魏書帝紀但云帝崩而已乃晉書苻堅載記謂堅討代王涉翼犍昭成名魏書北史涉作什遁還陰山其子翼圭魏書北史軍名圭縛父請降堅以其不孝遷之於蜀案圭卽道武帝繼昭成而立爲昭成嫡孫安得有縛父遷蜀之事

平文帝追尊太祖道武帝又追尊太祖二代全一廟號不可解顯祖名弘高祖名宏二字音義相近直似父子全名矣顯祖

生十二而立十八禪於高祖高祖纔五歲自古傳位無如此
早者亦可異

李先傳太宗召先讀韓子連珠二十二篇北史連珠下有論字
韓子之文往往先經後傳其體類乎連珠而所謂二十二篇
疑是六反八說八經也

儒林傳孫惠蔚周流儒肆有名冀方因侍講佛經愜旨詔加號
惠蔚法師以儒臣而加僧號可怪也柳州道州文宣王廟碑
有易師沙門凝誓杜樊川有燉煌管內釋門都監察僧正兼
州學博士僧慧苑除臨壇大德制云利根事佛餘力通儒領
生徒坐于學校貴服色舉以臨壇勉引兩教用化新邦是又
以浮屠參師儒之席尤屬異事

官氏志太和十九年詔詳定北人姓三月一列簿帳送門下以

聞釋老志城中舊寺及宅竝有定帳似帳字始見此漢書孝武紀後書光武紀注竝有計帳語北周書蘇綽傳始制文案程式朱出墨入及計帳戶籍之法顏元孫千祿字書序籍帳文案皆在此後

唐書百官志
履見此字

官職有從品始於元魏太和時自一品至九品皆有從前此未有也

釋老志趙郡沙門法果誠行精至太宗授以輔國宜城子忠信侯安成公之號卒贈老壽將軍趙胡靈公法果四十始爲沙門有子曰猛詔令襲果所加爵僧封公侯奇僧有子而襲爵更奇

時有沙門曇證亦
加老壽將軍號

釋老志沙門道登卒高祖詔朕師登法師奄至徂背痛但摧慟不能已已比藥治愼喪未容卽赴便準師義哭諸門外續素

之案唐釋道宣廣弘明集引作緇素榮之監本譌脫

魏書自序言成帝世魏歆終鉅鹿太守其子悅仕於魏太武時

所謂成帝者當是魏始祖成帝毛也然年代似太遠北史不

言成帝

諸葛堂云歆爲漢初魏無知之玄孫當是漢成帝其云歆子悅則必有脫誤也

北齊書杜弼傳弼注易上下繫攷隋經籍志不載弼書則當時

已亡弼性好名理兼注老莊其說易必精未知與韓伯若何

顏之推傳云父勰案梁書周書南史北史皆作顏協獨此作勰

必百藥之誤

北海王詳妃劉不妒詳母太妃杖之數十曰婦人皆妒汝何爲

不妒因不妒而受杖所謂以不狂爲狂也明陸采都公譚纂

言洪武中有劉指揮者年五十卒妻擊鼓自陳無子欲朝廷

給養太祖曰汝夫以百戰得一官將以富貴遺後嗣而不畜

妾豈非汝之悍耶本欲斬汝第念汝夫之勞著光祿寺給與漆椀木杖日令乞丐功臣之家以爲妒婦者戒如此處分較之賣皂莢騎驢牛更快

太祖事王文獻龍興慈記亦載之

北齊張景仁以善書至開府侍中封建安王可謂奇遇故史謂自蒼頡以來八體取進一人而已

漢末梁鵠以工書至選部尚書見魏志武帝紀注

周書柳慶傳慶出後第四叔因薨久不及追服迨遭父憂遂苦由終喪凡未服所後之父而遇本生父之喪者自可引慶爲例亦亡於禮之禮也

獨孤信長女周明敬后第四女唐元貞后生高祖第七女隋文獻后生煬帝三女爲后生二天子歷三朝皆外戚實自古未有也

周世宗宣懿皇后宋太宗懿德皇后皆符彥卿女亦是兩朝外戚

隋韓擒虎唐遼諱去虎字止稱韓擒與古二名稱一字者不全

案本傳韓本名豹故江南有黃斑之謠作史者何以不稱韓豹乎

北史后妃傳齊文宣段昭儀韶妹也婚夕韶妻元氏爲俗弄女壻法戲文宣今俗娶婦猶有此惡習案馬氏意林載風俗通汝南張妙會杜士家娶婦酒後相戲張妙縛杜士捶二十又懸足指遂致死抱朴子疾謬云俗間有戲婦之法於稠衆之中親屬之前問以醜言責以慢對其爲鄙黷不可忍論或躐以楚撻或繫脚倒懸酒客酣營不知限齊至使有傷于血流踈折支體者可歎也則此風自漢晉以來有之西陽雜俎北朝婚禮以杖打壻爲戲樂至有大委頓者

北史許智藏傳秦王俊夢亡妃崔氏相迎數日薨案俊傳崔氏以毒王故賜死于家兩傳矛盾蓋醫家附會以詫智藏之術

耳隋書全誤

宋子京刊修唐書喜用奇僻字然皆有來歷不可妄詆如媒蜴二字媒用漢書司馬遷傳媒孽其短蜴用外傳晉語蜴諧野客叢書引曹植藉田論輕鑿修鉤去樹之蜴以爲宋公本此去之遠矣又嚴九能云方言第七蜴噬逮也蜴噬與爾雅釋言遏逮全偏旁假借耳晉語二云陷于大難乃逮于讒蜴諧卽逮讒之義韋注失之亦是一解

武氏奪攘神器穢褻皇居其罪浮于呂雉而英鷲智數類之西陽雜俎言則天初誕之夕雌雉皆雉墨豈呂後身邪

唐以老子爲祖追加尊號最爲不經北周熊安生訟七十二世晉河南將軍熊光古冢五代郭崇韜自言子儀之後過墓號慟史籍書之傳以爲笑追尊老子得母類是

明流賊張獻忠追上梓潼神尊

號曰始祖高皇帝
見綏寇紀畧

年號自漢武帝始前此惟紀年而已嗣後皆仍之惟北魏廢帝
恭帝周閔帝金末帝元明宗寧宗無年號而唐肅宗上元二
年辛丑九月去上元號稱元年以建子月爲歲首月以斗所
建辰爲名至明年四月復舊此紀號後之一變旋卽殂落非
佳兆矣

僖宗之崩新書云文德元年二月乙亥不豫三月壬寅疾大漸
癸卯崩舊書云三月庚子上暴疾壬寅大漸癸卯崩所說違
疾月日兩紀不全案方回虛谷閒抄僖宗寵內園小兒張浪
狗一日浪狗買得好馬一疋時駕方自岐陽回長安馬畜宣
徽南院僖宗潛行看之巡繞馬左右馬忽騰躍右足踏僖宗
左脇便倒地不蘇浪狗驚惶急取銀水盂以尿灌僖宗良久

方蘇歸後稱氣疾以給醫凡二十餘人候脈出藥皆言是膀胱之氣竝無療効脇痛轉劇臥十二日崩所言臥疾日子又異而得疾暴崩之故可補史未備

宰相表韓愈子昶昶二子綰字持之袞字獻之余家藏昶自爲墓誌銘拓本末云有男五人曰緯前復州參軍次曰綰曰緄曰綺曰紀舉進士可補史表之缺袞亦當作緄

新唐書百官志序太宗省內外官定制爲七百三十員考新舊書曹確傳皆言太宗著令文武官六百四十三疑志誤

選舉志李德裕家不置文選惡其不根藝實可謂僻矣

刑法志太宗嘗覽明堂針灸圖見人之五臟皆近背詔罪人無得鞭背案漢書刑法志孝景中六年定筆令當笞者笞臂如淳曰然則先時笞背也是笞臂非始于太宗豈漢以後復笞

背至太宗改之歟

孔穎達一代大儒而王世充之篡隋穎達爲草禪儀與劉歆爲

新莽著符命何異

阮籍爲司馬昭勸進文亦全

高開道傳武德元年懷戎沙門高曇晟擁衆稱大乘皇帝立尼靜宣爲耶輸皇后沙門爲帝尼姑爲后殊可怪笑此尼居然爲武氏先聲

武后欲以武三思爲太子狄仁傑曰陛下立廬陵王則千秋萬歲後常享宗廟三思立廟不祔姑后悟案漢書韋玄成傳昭靈后武哀王昭哀后各有寢園與諸帝世世奉祠後罷而復祠并食於太上皇寢廟昭哀后者高祖之姊也是有祔姑于廟者然非禮矣故先儒以不經斥之

顏籀傳祖之推終隋黃門郎案北齊書北史之推於顯祖時曾

除黃門郎入隋之後祇太子召爲學士尋以疾卒此誤以齊官爲隋官也舊書言籀字師古新書言師古字籀亦不全

德宗取順宗之子諱爲第六子案五代閩陳洪進以子文顯之子爲子名文頊與父並行劉貢父內殿崇班康君墓誌銘君生二歲失父育于大父大父育爲己子君念父甚至及身登朝求改正昭穆未報皆以孫爲子者唐宋之制尚主者升行與諸父等此何爲乎

御覽三百五十六董卓別傳曰卓孫年七歲愛以爲己子

楊國忠史以爲楊珣之子張易之之甥案天寶遺事國忠本易之子也易之承恩武后每休沐歸詔居樓上仍去其梯母恐張氏絕嗣密令女奴蟬珠上樓遂生國忠與史不全觀國忠奏復易之兄弟官爵或者是歟

尉遲勝本于闐國王少宗時來朝妻以宗女祿山反率兵赴難

固請留宿衛封武都王讓國于其弟飾林亭厚賓客士大夫多從之游後唐明宗時東丹王突欲歸唐拜節度使喜賓客好飲酒工畫知書自契丹來歸載書數千卷其異書醫經皆中國所無者二人千古罕見東丹王好食人血姬妾皆刺臂吮之亦異性也

卽遼人
皇王倍

唐書言張巡守睢陽括城中老幼凡食三萬口又殺愛妾饗士許遠亦殺奴哺卒宋王明清摭青雜說曰紹興辛巳冬北人南侵朝廷遣大軍屯淮東每遣小校數隊候望有何兼資者領五千人至六合縣西望見軍馬自西北來兼資歛所部騭蘆荻中聞一人言荻林中有生人知爲鬼兵乃免胄出見拜問神號荅曰某唐張巡指對坐者曰此許遠指下坐者曰此雷萬春此南霽雲兼資少亦讀書因再拜頂禮曰史言大王

守城凡食三萬餘人果然否巡曰有之而實不然所食者皆已死之人非殺生人也又曰史言張大王殺愛妾許大王殺愛奴不知果否巡曰非殺也妾見孤城危逼勢不能保欲學虞姬綠珠之效死故自刎許大王奴亦以憂悸暴死遂烹以享士蓋用術以堅士卒之心耳兼資見雷萬春面止一疤因拜問曰史言將軍面著箭六而一疤何也萬春曰當時六箭五著兜鍪人人相傳謂吾面著六箭不動吾亦當之庶揚聲以威之也此事雖未可盡信然問荅數語頗中情理足與本傳相參又睢陽之陷全時死難者三十六人史傳除張許二公外惟南霽雲雷萬春姚閻其餘無聞焉案宋汪應辰文定集有玉山昭烈廟記言張汴家于滑之白馬與霽雲厚善全乞師賀蘭進明不與俱斷一指誓信軍中爲之驚駭出涕城

陷死之其氣節與霽雲等政和至乾道累封爲忠靖威顯靈佑英濟王論張王之始末甚備可補史所未及

裴度傳張權欲傾度作僞謠云非衣小兒坦其腹天上有口被驅逐考朝野僉載裴炎爲中書令徐敬業欲反令駱賓王畫計取炎全起事乃爲謠曰一片火兩片火緋衣小兒當殿坐張蓋用駱謠也

李光弼母李氏封韓國太夫人有鬚數十莖長五寸許亦異相也攷酉陽雜俎揚州東陵聖母廟主女道士康紫霞夢天符令攝將軍巡南岳自是生鬚數十根宣和遺事都城豐樂樓卽樊樓酒保朱氏子其妻年四十餘忽生髭髯長六七寸京尹聞于朝詔度爲女道士明葉子奇草木子元至正十一年春京師齊化門東街一婦人生髭鬚長一尺餘陸燦庚已編引

治末隨州應山縣女子生髭長三寸餘郎陽一婦生鬚三線約數十莖長數寸人目爲三鬚娘朱竹垞太史靜志居詩話明孫尚書鑛母楊氏名文儷有髯年過百齡然則婦人生鬚不定是貴徵矣

吳陳琰曠園雜志順治間杭城油局橋詹某女七歲歿時以手摸口鬚出三髯長數寸

王鐸長於部領軍州所用竹木其餘碎屑無所棄皆復爲用史臣曰竹頭木屑曾無棄遺今但稱晉陶侃無言鐸者

王叔文旣敗每誦杜甫諸葛祠詩未免不類若宋宗留守庶幾無媿

元載之敗也籍其家有鐘乳五百兩胡椒八百石

尚書故實可作九百斛

謂貴矣然蔡京家點檢蜂兒見在數目得三十七秤王黼家黃雀鮓自地至棟凡滿三楹見曲洧紀聞齊東野語甕牖間評又野語云籍童貫得劑成理中丸幾千斤籍賈師憲果子

庫糖霜凡數百囊王鏊震澤長語載嘉靖初籍沒朱寧貨財有蘇木七十三扛胡椒三千五百石香椒三十扛則元載不足言矣

新書朱延壽傳楊行密妻延壽姊也行密曰得舅代我無憂矣通鑑二百六十四卷作三舅

注延壽行三

或據此謂呼妻兄弟爲

舅始此案三國志先主傳獻帝舅董卓承注承靈帝母董太后之姪故謂之舅是以祖母之從子爲舅也今俗謂之表叔但董卓后河間人董卓隴西人魏志卓傳注皇甫酈曰董公有舅承璜以爲鯁毒舅是卓弟璜是卓之兄子則承亦其近屬也安得爲太后之姪疑因卓自以與太后全族當時或聯宗譜而獻帝以承女爲貴人故呼爲舅耳五代史記四夷附錄蕭翰之妹嫁德光契丹呼翰爲國舅元史忠義傳桂完澤與

其妻弟金德爲賊所執完澤呼曰金舅男子漢卽死不可聽
賊東坡詩長懷髯舅淒然謂王元直繼娶仝安縣君之弟

宋徽宗崇寧時書學博士董衡慕唐何超纂晉書音義作唐書
釋音二十五卷案姚宏姚寬注戰國策序皆引寶萃唐史釋
音而不稱董音豈當時董音不著耶又攷藝文志董衡之疑
釋音二十卷寶萃音訓四卷今寶音失傳董音是廿五卷宋
志脫五字

五代梁十六年而亡唐十四年晉十一年漢四年周十年共十
三君僅五十三年爾梁以唐末年爲元是而中間竊據之國
合四十一君閩五十年吳越八十四年淮南三十六年南唐
三十九年湖南五十六年荆南五十七年西川二十二年後
蜀四十年廣南五十五年河東二十九年其歷年反長于五

代可嘅也夫

自梁至周五十四年其間身仕五姓者不少以范魯公之賢亦
歷四朝入宋封公故太宗惜其欠世宗一死卽宋史周三臣
傳韓通李筠李重進皆非一代之臣而馮道獨蒙惡聲豈謂
其歷敘遭逢自稱長樂老耶長樂其鄉地名然魯公誠子詩前半
備述官閥與長樂老何異朱子刪取入小學爲賢者諱也故
後人又有稱美馮道者李延壽於褚淵攢譏竦謂至今齒冷
不啻歐陽公之傳馮道大抵市朝亟革寵貴方來陵闕雖殊
顧盼如一亦士大夫生世之不幸也

伶官傳敬新磨佯數縣令罪於唐莊宗前得勿殺此叔向諷晉
平公失鵠晏子救顏燭鄒亡鳥及圉人殺馬之故智也敬伶
必嘗讀書抑暗合古人歟

宋史最蕪冗疏畧枕堇浦太史嘗命余刪增別作一書自揆謏
薄謝不敢爲遂從事史記作志疑三十六卷聞前輩言湯若
士有宋史改本朱墨塗乙某傳當削某傳當補某人宜合某
傳某人宜附某傳皆注目錄之下科段分明王阮亭分甘餘
話謂臨川舊本在吳興潘昭度家恨無從購之許周生云潘
中丞昭度曾欲重修宋史先爲宋史抄摭拾最富友人楊鳳
苞見其殘藁十餘冊其全書則散佚久矣

徽宗用蔡京言集古今道教事爲紀志賜名道史元世祖詔樞
密副使張易參校道書言惟道德經爲老子所著餘皆後人
僞撰悉焚毀之道書最荒誕焚之殊快道史今不傳歷觀前
代大抵崇佛則黜道信道則斥佛惟周武帝獨尊儒斷佛道
二教盡廢經像沙門道士並令還俗其見卓矣

唐武德時亦
佛道並黜

理宗紀寶祐二年詔太常釐正秦檜諡因諭輔臣曰諡繆很可也案檜傳改諡是繆醜

藝文志有夾氏春秋三十卷攷漢志夾氏未有書隋志謂亡於王莽之亂則此三十卷必僞撰也故今亦不傳

司馬公爲黨人之首石工安民乞免鐫名碑末恐得罪後世又

九江碑工李仲寧不肖刊黨人碑

見揮麈錄

金完顏亮爲丞相金

主以司馬光畫像賀其生日金史承暉傳嘗置司馬光蘇軾像于書室曰吾師司馬而友蘇公大賢名著四海雖細人敵國亦知敬慕而宣和君臣乃目爲姦黨不亡何待

杜衍之名蓋取漢杜周南陽杜衍人故岐公字世昌

哲宗元祐七年賜柳宗元羅池廟爲靈文廟元泰定帝致和元年封爲文惠昭靈公文人身後褒榮勝方干及第矣

蘇子容奉詔撰契丹通好百年典章爲書二百五十卷賜名華

戎魯衛信錄見曾子開肇蘇司空墓誌銘又汪彥章蘇魏公

集序元豐中受詔爲華夷魯衛錄書成序之以獻神宗讀之

曰說卦文也

見浮溪集

書今不傳而宋史藝文志亦不載

頌傳有之

劉質近異錄宋寧宗慶元二年十月二十夜三更後月初出時

臨安嘉興二郡人未寢者皆見其圓如望夕太史奏爲上瑞

其地當十年大稔此事宋史紀志皆不載恐亦如竹書言天

再旦史記言日再中豈果吉祥善事歟

遼自太宗始建國號聖宗統和元年忽去之稱大契丹至道宗

咸雍二年復稱遼號

見李燾長編

歷代以來未見有改國號者

遼史儀衛志傳國璽漢獻帝失之孫堅得于井中傳至孫權以

歸于魏案後書徐璆袁術傳吳志孫堅傳注張讓等作亂天

子出奔左右分散掌璽者以投井中孫堅探得後爲袁術所奪術死徐璆致之漢朝則失璽是少帝非獻帝而璆以璽上漢漢亡歸魏非孫權以歸魏也

禮志公主下嫁賜物有送終車駕牛載羊一謂之祭羊擬送終之具至覆尸儀物咸在得毋不祥耶

金史章宗明昌元年令舉人程文所用故事考試官或遽不能憶誤失人材可自注出處出題亦於題下注其本傳此善法也前輩言八股盛而六經微恐不盡然特以今之所習謬種流傳大抵因陋就寡赴速邀時二句見唐書薛謙光傳欲除文弊當行此法題注出處免却多少揣摩載籍極博雖通人不能盡識且試人優劣全不係乎是也

明昌二年禁伶人不得以歷代帝王爲戲三年詔臣庶名犯古

帝王而姓復全者禁之周公孔子之名亦令回避

見本紀

此盛

德事避周公名古今惟此一見

宣宗紀興定二年憫京師丐食死於祁寒諭有司令居獲煥所
今京師冬月設有乞丐棲息之處俗謂之雞毛房蓋卽獲煥
所也今名爲棲流所

宇文虛中爲人媒孽指家藏圖書爲反具罪至族高士談圖書
尤多亦見殺士大夫家多藏圖籍固是美事然聚書之禍不
可不知

蒙古平定中原諸王統兵所下方域各爲已有因割裂州郡分
賜諸王貴族爲湯沐邑世有其土惟官吏必命于朝祖賦之
外不許徵斂而已此又改封建爲郡縣後之一變局也

元文宗名圖帖睦爾而文宗順帝二紀兩載至元六年詔皆稱

脫脫木兒必有一誤時有萬戶脫脫木兒又有荆王子脫脫

木兒豈君臣全名乎

諸王表懷王脫脫木兒亦即文宗

元順帝時追封最多本紀所載至元三年封郭璞靈應侯加封周處英義武惠正應王諡杜甫爲文貞加封文始尹真人爲無上太初博文文始眞君徐甲爲垂玄感聖慈化應御眞君庚桑子洞靈感化超蹈混然眞君文子通玄光暢昇元敏秀眞君列子冲虛至德遁世游樂眞君莊子南華至極雄文引道眞君五年封曹娥慈感靈孝昭順純懿夫人六年封微子仁靖公箕子仁獻公比干加封仁顯忠烈公加封張飛武義忠顯英烈靈惠助順王

王建天漢元年封張飛爲靈應王見宋張唐英蜀梟杌

至正元

年改封徽州土神汪華昭忠廣仁武烈靈顯王十年加封天妃父種德積慶侯母育聖顯慶夫人十一年加封河濱神靈

源神祐引濟王十四年加號海神輔國護聖庇民廣濟福惠
明著天妃十八年封劉黃文節昌平侯二十年加封福建鎮
閩王爲護國英仁武烈忠正福德鎮閩尊王二十二年加封
唐撫州刺史南庭王危全諷爲南庭忠烈靈惠王國將亡聽
于神豈不信哉

元史順帝紀二十二年三月明玉珍陷雲南省治屯金馬山陝
西行省參知政事車力帖木兒等擊敗之擒玉珍弟明二案
羣雄紀畧

失撰
人名

引明氏實錄玉珍本傳事在至正二十三年

三月明二卽萬勝其年四月萬勝引兵還重慶未嘗被擒也
萬勝之死在玉珍卒後因殺知院張文炳被誅當至正二十
六年二月萬勝乃玉珍義弟德安黃陂縣人智勇過人玉珍
寵愛之妻以弟婦故稱明二

黃標平夏錄謂文炳使玉珍
義子明昭殺勝所說又異

史漢謂春秋日食三十六自隱三年數至定十五年也元史歷志載李謙授時歷議獨謂三十七事蓋誤併哀公十四年一食數之而反遺僖五年一食仍是三十六日食矣

張立道傳先是雲南未知尊孔子祀王逸少爲先師亦異聞也封氏聞見記云流俗婦人多於孔廟祈子有露形登夫子之榻者一尊逸少一褻孔子皆奇事

安南傳宋封丁部領爲交趾郡王其子璉亦爲王傳三世爲李公蘊所奪卽封公蘊爲王案黎崱安南志畧

崱安南人元安順帝時內附

南古交趾郡五代之末爲丁部領所據宋太祖封爲交趾郡王傳璉濟凡三世其七年爲其臣黎桓所篡時宋太平興國五年也傳龍鉞龍廷亦三世其三十年爲其臣李公蘊所篡時宋大中祥符三年也宋史畧全此謂李公蘊奪丁氏誤也

又案崩志李傳八世共二百二十餘年其六世曰天祚宋孝宗隆興二年賜安南國名封天祚安南國王其八世曰吳昌無子立其女昭聖爲嗣昭聖立一年以國授于夫陳日煚時紹定三年也令李氏宗族與齊民姓李者更爲阮以絕民望然則阮氏卽李氏考明史建文時其臣黎季犛弑其主盡滅陳族而自立中更莫氏之變迄於明末二姓分據其地而黎氏陵夷至乾隆五十三年黎維祁失國阮光平代之是黎阮二氏皆其再興者也

嘉慶八年封阮福映爲越南國王始改安南之名

草木子云元世祖取易大哉乾元之義國號大元取至哉坤元之義年號至元

史言世祖從太保劉秉

湧幢小品謂大明以

別於小明王是元明兩代皆二字號興大漢大唐大宋爲臣下尊奉之辭不全又李翊戒菴漫筆言明初惡勝國之號稱

吳原年洪武原年俱不用元字亦史所不詳

明史嚴嵩傳嵩惟一子世蕃余尊姑夫呂稼華先生嘗言昔游分宜見嚴氏家譜世蕃有兄名世藍家居不仕睦鄰惇族鄉里稱爲善人今之子孫皆其苗裔史佚之也仲弟處素紀之以詩有云兄豈難爲非競爽子能不肖始稱賢池北偶談謂江右齒錄分宜子孫中式者不列其高祖名爵殆恥爲嵩後并沒世藍耳錄之以補史缺先生名伊好讀書伉爽不羈老于諸生年九十三卒

戒菴漫筆永樂末年詔天下學官考績不稱者淨身入宮訓女官輩時有十餘人王振在其中豈振亦科目出身耶長汀黎士弘仁恕堂筆記引黃溥今古錄亦言振出身教官淨身入

宮

傳奇言振與康熙
撰全學似非無本

明史言振少選入內書堂侍英宗東宮

明制訓導由貢生選
授振不必定科目也